

放光般若波羅蜜經卷第二十一 芥一

西晉三藏無羅叉共竺叔蘭譯

釋提桓因品第六十三

爾時釋提桓因白佛言世尊般若波羅蜜者甚深微妙難曉難了難解難知不可思議以

芥一

本淨故聞是深般若波羅蜜書持學者為已具足從大功德來想著之意為不復生至阿耨多羅三耶三菩亦無想著佛告釋提桓因言如是如是拘翼有行般若波羅蜜者不從小功德來拘翼闍浮提滿中衆生皆行十善四等四禪及四空定不如是善男子善女人書持般若波羅蜜諷誦受學知其教住至阿耨多羅三耶三菩不聽餘念其福百倍千倍巨億萬倍不可以譬喻為比爾時有異比丘語釋提桓因言拘翼是善男子善女人守行

奉持般若波羅蜜轉復教人者其功德出彼闍浮提衆生所作者上釋提桓因語是比丘言善男子善女人於般若波羅蜜中一發意勝闍浮提所作十善四禪四等五通者上何況奉行書持諷誦如中教者皆過諸天阿須倫世間人上是菩薩不獨過諸天世間人乃過須陀洹斯陀舍阿那含阿羅漢辟支佛上不但過是上乃至菩薩行五波羅蜜無般若波羅蜜漚起拘舍羅者上菩薩如般若波羅蜜教住者出諸天世人上諸天世人皆不能及如般若波羅蜜教住者為不斷薩云然種地住終不離如來名號菩薩行如是終不失道場菩薩摩訶薩所行如是為欲拔出衆生沉沒長流者如是學者為學菩薩所學不學聲聞辟支佛學菩薩如是學者諸四天王當

來至是菩薩所言善男子善女人勤學疾學成阿耨多羅三耶三菩坐於道場時過去諸如來無所著等正覺所持四鉢今在是閻當奉不久如是行般若波羅蜜者諸釋提桓因亦當復來勸助是善男子善女人須焰天子

芥一

二

將諸焰天子來下兜率天子將諸兜率天子來下諸尼摩羅天皆悉來下諸波羅尼蜜天亦悉來下乃至首陀會諸天皆悉來下至是行深般若波羅蜜菩薩所十方現在諸如來無所著等正覺皆常念是善男子善女人行般若波羅蜜者行是深般若波羅蜜者諸所世間所有厄難勤苦之事了無復有須菩提是為行般若波羅蜜者現世功德之報一切世間皆有四病一事動者身中諸根無不受病以受病故意便受惱是諸病惱不復著是

菩薩身用行深般若波羅蜜故是為現世功德之報爾時阿難意念釋提桓因自持辯才說以佛事說釋提桓因知阿難意之所念語阿難言我之所說皆是佛事佛告阿難釋提桓因所可說者皆是佛事因緣若菩薩學習

念般若波羅蜜時三千大千國土中魔皆生狐疑今是菩薩當為實際作證取聲聞辟支佛道耶當成阿耨多羅三耶三菩阿惟三佛乎阿難若有菩薩不離般若波羅蜜時魔復大愁毒爾時魔復起大風欲使是菩薩恐怖有難起懈怠之意欲使菩薩於薩云然念中起一亂意阿難白佛言世尊魔為都盧燒亂諸菩薩耶有不燒者佛告阿難有行亂者有不亂者阿難白佛言有燒者誰不燒者誰佛言菩薩從本聞般若波羅蜜時意中不樂不

芥一

三

解者波旬便往燒亂若聞說深般若波羅蜜時意中狐疑言爲審有是耶爲無有耶用是故波旬往燒復次阿難若有菩薩遠離真知識便不聞不知般若波羅蜜不解其事意便不樂是故波旬復往燒亂復次阿難若有菩薩遠離般若波羅蜜反持非法用是故魔得其便復次阿難菩薩失般若波羅蜜更歎非法魔即歡喜念言彼說非法之事當有若干伴輩當滿我願復并使餘人墮於二地羅漢辟支佛是也復次阿難若有菩薩聞說深般若波羅蜜時便意念言是深不能大深耶作是念者魔便念言我今已得子便復次阿難若有菩薩向餘人貢高言我能行六波羅蜜汝不能行是菩薩爲魔所得便阿難時魔波旬大歡喜踊躍復次阿難若有菩薩自怙智

慧自怙種姓自怙其善自怙知識便起貢高下於他人亦無阿惟越致相行像貌專自貢高輕賤他人便語人言汝亦不在菩薩種姓之中現汝亦不在摩訶衍中爾時波旬歡喜念言今我境界宮殿不空增益三惡趣我種姓不損魔常伺是菩薩欲使說非法之事欲使衆人皆聞非法亦當邪見增益勞垢造顛倒行顛倒於法身口意錯貪著邪福從是因緣增益三惡趣魔之眷屬宮殿益多爾時波旬倍歡喜踊躍而自娛樂復次阿難若行菩薩道者與聲聞道家共諍魔時念言是善男子離薩云然遠不近大智所以者何闕爭怨恚非薩云然道是三惡之業復次阿難菩薩自還共諍波旬念言兩離佛遠失薩云然是二菩薩俱不得成阿耨多羅三耶三菩

所以者何是善男子所造是三惡業非薩云然復次阿難未受剃者與得記剃菩薩共諍興起惡意隨其意起多少之數却若干劫雖起諍意如故不捨薩云然者當却劫數若干徑路然後乃成阿耨多羅三耶三菩阿難白佛言世尊乃當更爾所劫數於其中間寧有除不佛告阿難我爲三乘說法隨其意起多少之數各盡其事無有中間減少除之佛告阿難若菩薩菩薩共諍若恚若罵懷恨不悔者我不說有除當更劫數勤行僧那然後乃成若有菩薩鬪諍恚已便自悔言是利難得我今當爲一切下屈今世後世當使衆生皆共和解我今云何惡聲加人而念人惡我終不敢復作是事當如羴羊當自除過成阿耨多羅三耶三菩度脫衆生云何起恚而自陷

溺不當起恨不當陷溺爾時菩薩適起是意已魔波旬不能得其便復次阿難行菩薩者不當與聲聞家共止若共止者不當與諍所以者何當自念言我不應得與是輩人起恚共諍我當成就阿耨多羅三耶三菩度諸苦厄阿難白佛言世尊菩薩菩薩自共住止其法云何佛告阿難菩薩菩薩共止之法相視當如世尊共止所以者何當作念言是我真伴共乘一船彼學我學是爲同學共行檀波羅蜜至薩云然若彼意憤不順薩云然者我所不應若彼意定不離薩云然者我亦應爾菩薩摩訶薩作是學者爲共等學問等學品第六十四須菩提白佛言世尊何等爲菩薩摩訶薩之等所應學者佛告須菩提內空外空是菩薩

摩訶薩之等五陰自空乃至于道道亦自空
須菩提是空爲是菩薩摩訶薩之等於是等
空成阿耨多羅三耶三菩須菩提言世尊菩
薩學消五陰爲學薩云然五陰不染爲學薩
云然學滅五陰爲學薩云然不生五陰爲學
薩云然乃至四無礙學爲學薩云然佛告須
菩提如所言學消五陰爲學薩云然乃至學
無所生爲學薩云然佛言於須菩提意云何
五陰所有如乃至道如及世尊如是諸如頗
有滅盡滅時不須菩提言不也世尊佛言菩
薩如是學爲學如爲學薩云然如亦不盡亦
不滅亦不滅如是學爲學如爲學薩云然菩
薩如是學爲學六波羅蜜爲學三十七品爲
學佛十八法爲學薩云然佛告須菩提菩薩
作如是學爲度諸學表爲第一學如是學者

諸天及魔不能壞敗如是學疾近阿惟越致
如是學者爲習尊業爲習如來如是學者爲
導御衆生如是學者爲淨佛土爲學大慈大
悲爲學教化衆生須菩提菩薩如是學者爲
學三合十二法輪轉度脫衆生如是學者爲
學不斷佛種如是學者爲學開甘露法門作
如是學爲學示無爲法須菩提下劣之人不
能學是作是學者爲欲拔一切衆生生死之
根如是學者爲不入三惡趣不生邊地不生
旃陀羅家如是學者不復聾盲瘖瘂跛蹇如
是學者諸根具足終不缺減無惡音聲不犯
十惡終不學耶以自生活不爲無反復不與
惡者俱須菩提如是學者不生長壽天用漚
起拘舍羅故何等爲漚起拘舍羅般若波羅
蜜所說漚起拘舍羅四禪四等及四空定不

墮禪計如是學者為淨一切諸法之力淨羅漢辟支佛力須菩提白佛言世尊諸法之性皆自清淨云何菩薩欲淨諸法佛告須菩提如是如是菩薩已淨性之本學般若波羅蜜不歇不懈是為學般若波羅蜜是法非是凡夫愚人之所能學所能知見菩薩為眾生故行檀波羅蜜至薩云然菩薩學如是為學十力為學無所畏力如是學者出過眾生所為之表須菩提譬如地之所出金銀異寶少少處出耳如是須菩提少少人學般若波羅蜜多有發聲聞辟支佛意少少人能行遮迦越羅福者作粟散小王行者多少少眾生能入薩云然者多有人入羅漢辟支佛道須菩提多所人求阿耨多羅三耶三菩提者得成就者少少耳多住羅漢辟支佛地須菩提多有

人行菩薩道學般若波羅蜜者至阿惟越致地者亦少少耳用是故須菩提若欲堅住在阿惟越致地者當學深般若波羅蜜復次須菩提菩薩學般若波羅蜜時嫉意不生犯戒意不生恚意不生亂意不生懈怠意不生愚癡意不生三毒意不生疑意不生五陰意不生乃至道意不生何以故須菩提是菩薩行深般若波羅蜜時不見法有所生者於無生法亦無所得亦無所起是故菩薩學持深般若波羅蜜為悉總持諸波羅蜜何以故菩薩學深般若波羅蜜時諸波羅蜜皆悉隨從譬如著吾我之人悉總持六十二見是故菩薩學般若波羅蜜諸波羅蜜皆悉隨從譬如人欲死時風先命去諸根悉滅須菩提菩薩行深般若波羅蜜時諸波羅蜜皆悉入中菩薩

欲出過諸波羅蜜表者當學深般若波羅蜜
學深般若波羅蜜者為學人中最尊上須菩
提三千大千刹土其中衆生寧為多不須菩
提言世尊一閻浮提衆生尚多况乃三千大
千刹土所有衆生佛言今此衆生盡得人道
悉得阿耨多羅三耶三菩若有菩薩一一供
養衣被飲食衆所當得盡其壽命其福寧多
不須菩提言甚多甚多佛言不如是善男子
善女人至意念般若波羅蜜也何以故是深
般若波羅蜜者是諸菩薩摩訶薩之大益能
使菩薩成阿耨多羅三耶三菩須菩提菩薩
欲在衆生之上一切衆生為無所歸無所依
怙欲受其歸欲為作依怙者欲為盲人作明
導者欲求作佛者欲得佛境界者欲作佛遊
步者欲為佛師子音響者欲撞擊佛鐘鼓者

欲吹大螺音者欲為佛會講說佛法義決斷
衆人諸狐疑者悉欲得是者當學深般若波
羅蜜菩薩行般若波羅蜜者所有三界諸善
之福德無事不得須菩提言世尊菩薩寧從
得羅漢辟支佛之福德耶佛言亦得羅漢辟

支佛之福德但不於中作證耳以智慧觀察
羅漢辟支佛慧即得過不於中住自上菩薩
位菩薩作如是學者去薩云然不遠疾成阿
耨多羅三耶三菩須菩提菩薩如是學者為
諸天阿須倫之福祐如是行者過諸羅漢辟
支佛上疾近薩云然須菩提如是學者不久
行般若波羅蜜不離般若波羅蜜菩薩如是
行深般若波羅蜜當知是為不耗減法不遠
薩云然疾近三乘慧菩薩若復反作念言彼
此般若波羅蜜便不逮薩云然作是念者為

不行般若波羅蜜若復此彼深般若波羅蜜
不知般若波羅蜜亦不見般若波羅蜜亦不
知般若波羅蜜為誰亦不知誰當於般若波
羅蜜中得阿耨多羅三耶三菩提若復作是念
般若波羅蜜亦非彼亦非此亦無從中出者
法性常住如真際有佛無佛法性常住菩薩
摩訶薩作是學者為學般若波羅蜜

放光般若波羅蜜經卷第二十一

音釋

拘翼 翼音亦 帝釋名 **漚** 愆語也此云方
和 音和 摩訶衍 梵語也此云 **勃** 必列切
鑿切濁憤 古外切心 **跛蹇** 記勃也 **陷溺** 陷
於行也 **撞擊** 撞陟切 **螺** 落戈切 **蹇** 補火切蹇九
於行也 **撞擊** 撞陟切 **螺** 落戈切 **蹇** 補火切蹇九